



DIKELUARKAN OLEH JABATAN MUFTI PERLIS

MENCINTAI RASULULLAH SAW

(TEKS KHUTBAH JUMAAT 5 SEPTEMBER 2025 MASIHI / 12

RABIUL AWAL 1447 HIJRAH)

MENCINTAI RASULULLAH SAW

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ
أَعْمَالِنَا، مَنْ يَهْدِهِ اللَّهُ فَلَا مُضِلَّ لَهُ وَمَنْ يُضِلِّهِ فَلَا هَادِيَ لَهُ، أَشْهَدُ أَنْ لَا إِلَهَ إِلَّا
اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى مُحَمَّدٍ
وَعَلَى آلِهِ وَأَصْحَابِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ. يَا أَيُّهَا الَّذِينَ آمَنُوا اتَّقُوا اللَّهَ
حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ. أَمَّا بَعْدُ، فَإِنَّ أَصْدَقَ الْحَدِيثِ كِتَابُ اللَّهِ،
وَخَيْرَ الْهُدَى هُدَى مُحَمَّدٍ صَلَّى اللَّهُ عَلَيْهِ وَسَلَّمَ، وَشَرَّ الْأُمُورِ مُحَدَّثَاتُهَا، وَكُلَّ مُحَدَّثَةٍ
بِدْعَةٌ، وَكُلَّ بَدْعَةٍ ضَلَالَةٌ، وَكُلَّ ضَلَالَةٍ فِي النَّارِ.

Sidang Jumaat Yang Dirahmati Allah,

Marilah kita meningkatkan ketakwaan kepada Allah dengan bersungguh-sungguh melaksanakan segala perintah-Nya dan meninggalkan segala larangan-Nya. Khutbah pada hari ini bertajuk: “MENCINTAI RASULULLAH SAW.”

Sidang Jumaat Yang Dihormati Sekalian,

Mencintai Rasulullah SAW bukanlah perkara yang boleh dipandang ringan atau dianggap sekadar pilihan sampingan. Bahkan, ia adalah asas yang menghidupkan jiwa seorang Muslim. Tanpa cinta kepada Rasulullah SAW, iman kita tidak akan sempurna. Sesungguhnya iman seseorang tidak akan sempurna sehingga kecintaannya kepada Rasulullah SAW mengatasi kecintaan kepada keluarga, orang yang paling dekat, dan seluruh manusia. Rasulullah SAW bersabda:

وَالَّذِي نَفْسِي بِيَدِهِ لَا يُؤْمِنُ أَحَدُكُمْ حَتَّىٰ أَكُونَ أَحَبَّ إِلَيْهِ مِنْ وَالِدِهِ وَوَلَدِهِ وَالنَّاسِ
أَجْمَعِينَ

Ertinya: **“Demi (Allah) yang jiwaku berada di tangan-Nya, tidak sempurna iman salah seorang daripada kamu sehingga aku lebih dia cintai daripada ayahnya, anaknya, dan seluruh manusia.”** (Hadis Riwayat al-Bukhārī)

Jelaslah, cinta kepada Rasulullah SAW adalah syarat kesempurnaan iman. Namun cinta itu tidak cukup dengan hanya berselawat di bibir, tidak memadai dengan hanya mengaku **“kita umat Nabi Muhammad”**. Cinta itu mesti dibuktikan dengan ketaatan, dengan mengikuti sunnah, dengan meninggalkan perkara bidaah, dan dengan mendahulukan Nabi lebih daripada segala yang kita cintai.

Sidang Jumaat Yang Dikasihi Allah Sekalian,

Islam telah menggariskan beberapa cara yang nyata untuk menyuburkan kecintaan ini agar kita tergolong dalam golongan yang benar-benar mengamalkan ajaran Baginda Rasulullah SAW. Antaranya ialah:

Pertama: Mentaati segala perintah dan larangan Baginda Rasulullah SAW. Tanda cinta yang benar adalah ketaatan yang menyeluruh. Sesiapa yang benar-benar mencintai Rasulullah SAW akan menjadikan setiap arahan dan larangan Baginda sebagai panduan hidup. Allah SWT berfirman:

وَأَطِيعُوا اللَّهَ وَأَطِيعُوا الرَّسُولَ فَإِن تَوَلَّيْتُمْ فَإِنَّمَا عَلَىٰ رَسُولِنَا الْبَلَاغُ الْمُبِينُ ﴿١٣﴾

Maksudnya: **“Dan taatlah kepada Allah serta taatlah kepada Rasul. Maka jika kamu berpaling, kewajiban Rasul hanyalah menyampaikan risalah dengan penjelasan yang nyata.”** (Surah At-Taghabun, Ayat 12)

Ayat ini menegaskan bahawa ketaatan kepada Rasulullah SAW adalah sebahagian daripada ketaatan kepada Allah SWT. Ia menuntut setiap Muslim untuk mengamalkan syariat Baginda dalam semua aspek kehidupan, bukan sekadar ketika berada di masjid atau menunaikan solat.

Ketaatan kepada Rasulullah SAW merangkumi pemeliharaan akidah, penunaian ibadah, muamalah yang adil dan amanah, serta akhlak mulia dalam pergaulan seharian.

Dengan mengamalkan syariat Baginda secara menyeluruh, seorang Muslim menunjukkan iman yang kukuh dan cinta yang mendalam kepada Nabi SAW. Ketaatan yang berterusan ini juga menjadi bukti kesungguhan untuk hidup menurut panduan Islam secara menyeluruh, meneladani setiap ajaran Baginda yang membawa kepada keredaan Allah SWT.

Kedua: Mencontohi dan mengikuti Nabi SAW dalam perkara akidah yang benar. Akidah merupakan asas iman setiap Muslim. Tanpa akidah yang benar, seluruh amal ibadah kita tidak akan diterima Allah SWT. Mencontohi Nabi SAW dalam perkara akidah bermaksud mengimani dan menerima kebenaran yang dibawa Baginda tanpa menyeleweng, serta mengikuti ajaran yang jelas daripada wahyu Allah.

Ia juga menuntut kita menjauhi segala bentuk syirik, bidaah, dan kekufuran yang boleh merosakkan iman. Iman yang teguh membawa ketenangan jantung hati dan keberkatan dalam kehidupan. Dengan meneladani akidah Nabi SAW, seorang Muslim dapat menjadi insan yang mantap imannya, kuat pegangan dalam syariat, dan selamat daripada pengaruh ajaran sesat. Allah SWT berfirman:

فَإِنْ ءَامَنُوا بِمِثْلِ مَا ءَامَنْتُمْ بِهِ ۖ فَقَدِ اهْتَدَوْا ۗ

Maksudnya: *Maka jika mereka beriman kepada apa yang kamu telah beriman kepadanya, sungguh mereka telah mendapat petunjuk.*” (Surah al-Baqarah Ayat 137)

Ayat ini menekankan bahawa iman yang sempurna ialah meyakini Allah, Rasul-Nya, dan kitab-kitab-Nya, serta menolak kekufuran terhadap mereka. Oleh itu, meneladani akidah Nabi SAW adalah kunci untuk menjaga iman, mengelakkan kekeliruan, dan melindungi diri daripada ajaran sesat yang merosakkan.

Ketiga: Mencontohi dan beribadah sebagaimana Nabi SAW. Ibadah seorang Muslim menjadi sah dan sempurna apabila dilakukan mengikut cara Baginda. Meneladani Baginda dalam solat, zakat, puasa, dan ibadah lain memastikan amalan kita selaras dengan syariat, terhindar daripada bidaah, diterima Allah, dan mendekatkan diri kepada-Nya. Rasulullah SAW bersabda:

صَلُّوا كَمَا رَأَيْتُمُونِي أُصَلِّي

Ertinya: **“Solatlah kamu sebagaimana kamu melihat aku solat.”** (Hadis Riwayat al-Bukhārī dan Muslim)

Hadis ini menegaskan bahawa cara terbaik menunaikan ibadah adalah dengan mencontohi Nabi SAW. Bayangkan setiap rakaat solat kita bukan sekadar gerakan fizikal, tetapi manifestasi kecintaan kepada Nabi SAW dan usaha meneladani Baginda dalam amal soleh. Ibadah yang dicontohi Baginda akan memperbetulkan amalan kita, memberi ketenangan jantung hati, serta menambahkan keberkatan dalam kehidupan seharian.

Keempat: Mencontohi akhlak Nabi SAW. Akhlak mulia adalah tanda iman yang sebenar. Nabi SAW diutus untuk menyempurnakan akhlak manusia, menjadikan kejujuran, kesabaran, pemaafan, dan kasih sayang sebagai panduan hidup setiap Muslim. Mencontohi akhlak Baginda membawa keberkatan kepada diri, keluarga, dan masyarakat. Nabi SAW bersabda:

إِنَّمَا بُعِثْتُ لِأَتَمِّمَ مَكَارِمَ الْأَخْلَاقِ

Ertinya: **“Sebenarnya aku diutus untuk menyempurnakan akhlak yang mulia.”** (Hadis Sahih Riwayat Ahmad)

Hadis ini menunjukkan bahawa salah satu misi Nabi SAW adalah membentuk manusia dengan akhlak yang mulia. Apabila kita meneladani akhlak Baginda, kita bukan sahaja dicintai Allah, malah menjadi teladan yang baik bagi masyarakat. Akhlak mulia menimbulkan kasih sayang, menyelesaikan konflik, dan memperkukuh hubungan dalam keluarga serta masyarakat.

Kelima: Mendidik diri, keluarga, serta masyarakat mengikut sunnah Nabi SAW. Cinta kepada Baginda bukan hanya melalui ucapan atau doa, tetapi melalui pengamalan sunnah Baginda dan mendidik orang lain agar mengikutinya. Menyemai sunnah dalam keluarga dan masyarakat adalah cara terbaik untuk membentuk generasi soleh, beriman, dan berakhlak mulia. Usaha ini bukan sekadar membina individu, tetapi juga membentuk masyarakat yang teguh imannya dan berperadaban mulia. Rasulullah SAW bersabda:

مَنْ أَحْيَا سُنَّةً مِنْ سُنَّتِي، فَعَمِلَ بِهَا النَّاسُ، كَانَ لَهُ مِثْلُ أَجْرِ مَنْ عَمِلَ بِهَا، لَا يَنْقُصُ مِنْ

أُجُورِهِمْ شَيْئًا

Ertinya: ***“Barangsiapa yang menghidupkan satu sunnah daripada sunnahku, lalu diamalkan oleh orang lain, maka baginya pahala seperti pahala orang yang mengamalkannya itu, tidak berkurang sedikit pun daripada pahala mereka.”*** (Hadis Sahih Riwayat Ibnu Majah)

Hadis ini menunjukkan bahawa sesiapa yang menegakkan sunnah Nabi SAW akan memperoleh pahala, termasuk pahala orang yang mengikuti sunnah itu selepasnya. Oleh itu, mendidik keluarga dan masyarakat agar meneladani Baginda adalah bukti cinta kepada Baginda, dan usaha ini memberi manfaat dunia serta akhirat.

Sidang Jumaat Yang Dikasihi Allah Sekalian,

Cintailah Nabi SAW dengan sepenuh jiwa. Jangan hanya mendakwa cinta melalui kata-kata, tetapi meninggalkan sunnah Baginda. Jangan sekadar berselawat di bibir, tetapi mengabaikan perintah dan ajaran Rasulullah SAW. Jangan pula menghidupkan amalan-amalan bidaah lalu menyangka itu tanda kasih. Ingatlah, cinta kepada Nabi bukan sekadar lafaz, tetapi terpancar melalui amal yang nyata; bukan pada ritual yang direka-reka, tetapi hidup dalam sunnah yang suci; bukan sekadar pada perasaan, tetapi terserlah melalui ketaatan yang ikhlas kepada Rasulullah SAW semata-mata kerana Allah SWT.

بَارَكَ اللهُ لِي وَلَكُمْ فِي الْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ.

KHUTBAH KEDUA

الْحَمْدُ لِلَّهِ الَّذِي أَنْزَلَ عَلَى عَبْدِهِ الْكِتَابَ وَلَمْ يَجْعَلْ لَهُ عِوَجًا. وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى مُحَمَّدٍ وَعَلَى آلِهِ وَصَحْبِهِ أَجْمَعِينَ، أَمَّا بَعْدُ: فَيَا أَيُّهَا الْمُسْلِمُونَ، اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

Sidang Jumaat yang dikasihi Allah sekalian,

Salah satu amalan yang sangat mulia dan diberi ganjaran besar ialah memelihara anak yatim. Rasulullah SAW menekankan keutamaan amal ini dengan memberi perumpamaan yang jelas tentang kedekatan seorang hamba dengan Rasulullah SAW di akhirat kelak. Sepertimana Rasulullah SAW bersabda:

وَأَنَا وَكَافِلُ الْيَتِيمِ فِي الْجَنَّةِ هَكَذَا وَأَشَارَ بِالسَّبَابَةِ وَالْوُسْطَى وَفَرَّجَ بَيْنَهُمَا شَيْئًا

Ertinya: *“Dan aku serta orang yang memelihara anak yatim di syurga kelak berada sebegini,” (lalu Baginda) mengisyaratkan jari telunjuk dan jari tengahnya, dan merenggangkan keduanya sedikit.*” (Hadis Riwayat Al-Bukhari)

Hadis ini menunjukkan betapa dekatnya seorang hamba yang menjaga anak yatim dengan Rasulullah SAW di syurga. Jarak yang ditunjukkan oleh isyarat jari Baginda melambangkan kedudukan yang mulia dan ganjaran besar bagi mereka yang memberi kasih sayang dan perhatian kepada anak-anak yatim.

Bagi anak-anak yatim yang berada di rumah jagaan anak yatim, kita boleh menyantuni mereka dengan pelbagai cara, seperti memberi mereka makan dan minum dengan penuh kasih sayang; menyediakan pendidikan, bimbingan, dan perhatian untuk mengisi kekurangan mereka; meluangkan masa untuk bermain dan menemani mereka supaya mereka merasa disayangi; menyediakan keperluan harian seperti pakaian, barangan peribadi, dan peralatan sekolah; serta menonjolkan akhlak yang mulia dan menjadi contoh yang baik supaya mereka meneladani kita.

Setiap usaha ini bukan sahaja amal kebaikan di dunia, tetapi juga jalan untuk memperoleh kedudukan istimewa bersama Rasulullah SAW di syurga kelak. Marilah kita menjadikan amalan mulia ini sebahagian daripada kehidupan harian, kerana kedekatan dengan Baginda di syurga adalah nikmat yang tiada tandingannya.

Sidang Jumaat Yang Dihormati Sekalian,

Sesungguhnya, Allah SWT berfirman dalam surah Al-Ahzab Ayat 56:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾

Maksudnya: “*Sesungguhnya Allah dan para malaikat berselawat ke atas Nabi, maka wahai orang-orang yang beriman hendaklah kamu berselawat dan salam ke atas Nabi*”.

اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ

وَبَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي

الْعَالَمِينَ إِنَّكَ حَمِيدٌ مَجِيدٌ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ،

الْأَحْيَاءِ مِنْهُمْ وَالْأَمْوَاتِ. إِنَّكَ سَمِيعٌ قَرِيبٌ مُجِيبُ الدَّعَوَاتِ وَقَاضِي الْحَاجَاتِ.

Ya Allah!, Ya Ghaffar! Engkau ampunilah seluruh kaum muslimin dan mukminin sama ada yang hidup ataupun yang telah mati. Ya Allah! Engkau berikan petunjuk hidayah serta rahmat-Mu kepada kami sekalian hamba-hamba-Mu dan kepada pemimpin kami terutamanya Raja pemerintah Negeri Perlis Tuanku Syed Sirajuddin Ibnu Al-Marhum Tuanku Syed Putra Jamalullail dan Raja Muda Perlis Tuanku Syed Faizuddin Putra Ibnu Tuanku Syed Sirajuddin Jamalullail serta kaum kerabat Baginda, supaya sentiasa beramal dengan kitab-Mu dan sunnah nabi-Mu. Engkau lanjutkanlah usia baginda berdua dalam keadaan selamat, sihat sejahtera dan menegakkan pemerintahan yang adil lagi diredhai oleh-Mu.

Ya Allah!, Ya Rahman! Kami memohon kepada-Mu dengan segala kerendahan diri sebagai hamba-Mu. Engkau indahkanlah akhlak kami. Engkau perbaikilah pergaulan antara kami. Engkau jadikanlah kami umat Islam yang bermentaliti kelas pertama dalam tindakan. Engkau peliharalah kami dari bersifat lemah, malas, berfikiran sempit dan buruk budi pekerti.

Ya Allah!, Ya Rahim! Engkau limpahkanlah Negeri Perlis ini dengan keberkatan, bimbinglah penduduknya kepada amalan soleh yang Engkau redha. Penuhi jiwa kami dengan mencintai agama-Mu.

Ya Allah!, Ya Qadir! Engkau berilah pertolongan, inayah, dan kekuatan kepada semua peserta misi Sumud Flotila, peliharalah mereka dari segala halangan dan gangguan, lindungilah nyawa dan tubuh mereka, berilah ketenangan dan ketabahan kepada mereka serta keluarga, selamatkan harta benda dan barang bantuan yang dibawa, terimalah usaha mereka sebagai jihad dan amalan soleh, dan berilah kemenangan kepada umat Islam di Palestin, Gaza, dan seluruh dunia serta binasakan Yahudi Zionis dan pembantu-pembantu mereka.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. وَصَلَّى اللَّهُ عَلَى نَبِيِّنَا

مُحَمَّدٍ وَالْحَمْدُ لِلَّهِ رَبِّ الْعَالَمِينَ.